話說天下大勢、分久必合、合久必分。 周末七國分爭、并入於秦。 及秦滅之後、楚、漢分爭、又并入於漢。 漢朝自高祖斬白蛇而起義、一統天下。 後來光武中興、傳至獻帝、遂分爲三國。 推其致亂之由、殆始於桓、靈二帝。 桓帝禁錮善類、崇信宦官。 及桓帝崩、靈帝即位、大將軍竇武、太傅陳蕃、共相輔佐。 時有宦官曹節等弄權、竇武、陳蕃謀誅之、機事不密、反爲所害、中涓自此愈橫。

建寧二年四月望日、帝御溫德殿。 方陛座、殿角狂風驟起、只見一條大青蛇、從梁上飛將下來、蟠於椅上。 帝驚倒、左右急救入宮、百官俱奔避。 須臾、蛇不見了。 忽然大雷大雨、加以冰雹、落到半夜方止、壞卻房屋無數。 建寧四年二月、洛陽地震。 又海水泛溢、沿海居民、盡被大浪捲入海中。 光和元年、雌雞化雄。 六月朔、黑氣十餘丈、飛入溫德殿中。 秋七月、有虹見於玉堂、五原山岸、盡皆崩裂。 種不祥、非止一端。 帝下詔問群臣以災異之由、議郎蔡邕上疏、以爲蜺墮雞化、乃婦寺干政之所致、言頗切直。 帝覽奏歎息、因起更衣。 曹節在後竊視、悉宣告左右。 遂以他事陷邕於罪、放歸田里。 後張讓、趙忠、封諝、段珪、曹節、侯覽、蹇碩、程曠、夏惲、郭勝十人朋比爲奸、號爲「十常侍」。 帝尊信張讓、呼爲「阿父」、朝政日非、以致天下人心思亂、盜賊蜂起。

時鉅鹿郡有兄弟三人。 一名張角、一名張寶、一名張梁。那張角本是個不第秀才。 因入山採藥、遇一老人、碧眼童顏、手執藜杖、喚角至一洞中、以天書三卷授之曰、『此名《太平要術》。汝得之、當代天宣化、普救世人。若萌異心、必獲惡報。』角拜問姓名。 老人曰、『吾乃南華老仙也。』言訖、化陣清風而去。

角得此書、曉夜攻習、能呼風喚雨、號爲「太平道人」。 中平元年正月內、疫氣流行、張角散施符水、爲人治病、自稱「大賢良師」。 角有徒弟五百餘人、雲游四方、皆能書符念咒。 次後徒眾日多、角乃立三十六方、大方萬餘人、小方六七千、各立渠帥、稱爲「將軍」。 訛言、『蒼天已死、黃天當立。』又云、『歲在甲子、天下大吉。』令人各以白土、書「甲子」二字於家中大門上。

青、幽、徐、冀、荊、楊、兗、豫八州之人、家家侍奉大賢良師張角名字。 角遣其黨馬元義、暗齎金帛、結交中涓封諝、以爲内應。 角與二弟商議曰、『至難得者、民心也。今民心已順、若不乘勢取天下、誠爲可惜。』遂一面私造黃旗、約期舉事。一面使弟子唐州、馳書報封諝。 唐州乃逕赴省中告變。 帝召大將軍何進調兵擒馬元義、斬之。 次收封諝等一干人下獄。 張角聞知事露、星夜舉兵、自稱「天公將軍」、張寶稱「地公將軍」、張梁稱「人公將軍」。 申言於眾曰、『今漢運將終、大聖人出。汝等皆宜順天從正、以樂太平。』四方百姓、襄黃巾從張角反者、四五十萬。 賊勢浩大、官軍望風而靡。 何進奏帝火速降詔、令各處備禦、討賊立功。一面遣中郎將盧植、皇甫嵩、朱雋、各引精兵、分三路討之。

且說張角一軍、前犯幽州界分。 幽州太守劉焉、乃江夏竟陵人氏、漢魯恭王之後也。 當時聞得賊兵將至、召校尉鄒靖計議。靖曰、『賊兵眾、我兵寡、明公宜作速招軍應敵。』劉焉然其説、隨即出榜招募義兵。榜文行到涿縣、引出涿縣中一個英雄。

那人不甚好讀書。 性寬和、寡言語、喜怒不形於色。 素有大志、專好結交天下豪傑。 生得身長七尺五寸、兩耳垂肩、雙手過膝、目能自顧其耳、面如冠玉、脣若塗脂。 中山靖王劉勝之後、漢景帝閣下玄孫。姓劉、名備、字玄德。 昔劉勝之子劉貞、漢武時封涿鹿亭侯、後坐酎金失侯、因此遺這一枝在涿縣。 玄德祖劉雄、父劉弘。 弘曾舉孝廉、亦嘗作吏、早喪。 玄德幼孤、事母至孝。 家貧、販屢織蓆爲業。 家住本縣樓桑村。其家之東南、有一大桑樹、高五丈餘、遙望之、童童如車蓋。相者云、『此家必出貴人。』 玄德幼時、與鄉中小兒戲於樹下曰、『我爲天子、當乘此車蓋。』 叔父劉元起奇其言、曰、『此兒非常人也!』 因見玄德家貧、常資給之。 年十五歲、母使游學、嘗師事鄭玄、盧植。 與公孫瓚等爲友。 及劉焉發榜招軍時、玄德年已二十八歲矣。